

ցուրտ է, օրինակ. Նամակերտում, Ղառղունում, Սվարանում ամառը բաւական շոգ է անում, սակայն դրանից քիչ հեռու՝ Սանգիբարանում, Ներքին Խօյգանում, Դանում, Բոլորանում երբեմն Յունիս ամսին անգամ գիշերներն այնպիսի ցրտեր են անում, որ մարդ գիշերը երբ մտնում է անկողին, հաճութեամբ ծածկում է վերան բրդէ տաք վերմակը և անվերջ դիտելով գեղեցիկ և բանաստեղծական երկինքը՝ քնում է:

Բուսականութիւն: Փէրիայի հողը բերրի է և արգաւանդ, մի հանգամանք, որ նպաստում է առատ բուսաբերութեան: Ծիշդ է, գաւառը զուրկ է անտառներից, բայց հարուստ է բարեբեր դաշտավայրերով, սիրուն հովիտներով և լեռնադաշտերով, ուր մշակում են ամեն տեսակ ընտիր հացահատիկներ, բուսնում բազմատեսակ պտղատու ծառեր, զարգանում խաղողի այգիներ և արգիւնաբերական բոյսեր: Իսկ հրաշալի բարձրաւանդակները և հովասուն արօտատեղիներն իրենց հարուստ խոտերով ու բոյսերով նւառատում են անասնապահութեան և խաշնարածութեան. շնորհիւ այդ բարիքների առատութեան ճոխանում է ամբողջ Փէրիայի գաւառը:

Մշակող բոյսեր, հացահատիկներ եւ մրգեր: Արտերում և այգիներում մշակող բոյսերի, հացահատիկների և մրգերի գլխաւոր տեսակները հետեւեալներն են.—ցորեն, գարի, հաճար, կտաւհատ (որից ձէթ են պատրաստում տան գործածութեան համար), արեւածաղիկ, եօնջա, կորնկան, զօռատ, շաւղառ, դառազուռա, հօլլար, կէվտանա, ջրկոտեմ, մաշ, թարխուն, սուսամբար (զամբախ), գազար (քաշուր), թրէֆ, ճակնդեղ (ջողօնդար), ռեհան, անանուխ (թեր), դդում, գետնախնձոր (քիչ է), լոբի, ոսպ, սիսեռ (շատ քիչ), բակլայ, խաշխաշ (քիչ), քալ (սեխ), ձմերուկ, վարունգ և այլն:

Դաշտային բուսականութիւն (ինքնաբոյս): Դաշտերում բուսնում են հետեւեալ բոյսերը.—սինձ (որից աղցան